

JOANNIS CLERICI  
PRÆFATIO  
AD  
LECTOREM.

**N**IHIL est quod te, LECTOR, multis detineam, dum de *Eusebio*, *Hieronymoque* ejus interprete, vel de utilitate hujus operis ago. Pleraque omnia, quæ dici poterant, præcepit *Jacobus Bonfrerius*, eaque in sequente ejus præfatione legere poteris. Nonnulla etiam & nos, ante quatuor annos, in *Questionibus Hieronymianis*, diximus. Hoc ante omnia scias oportet, editionem hujus operis non fuisse apud me diuturni consilii partum; ad quem exornandum otiosè, quæ eam in rem conducere potuissent, conquiverim. Cùm ad finem Sansonianæ Geographiæ Sacræ fermè pervenisset Bibliopola, nec de locis *Eusebii* Hebraicis cogitaret, vir quidam eruditus hominem monuit de libello *Hieronymi*, cui præfixa est eadem inscriptio, & quem ad calcem *Sansonis* edi posse censebat. Bibliopola rem ad me retulit, intellexitque à me, satius fore, si ederet *Eusebium*, cum *Hieronymo*, adderetque supplementa & notas *Jacobi Bonfrerii* Jesuitæ; de quo Opere dixeram in *Sansonis* præfatione. Cùm illi ergo Onomasticon *Bonfrerii* ostendissem, & per aliquot dies deliberasset, hanc Editionem aggressurum esse se dixit; præsertim cùm nimis tenuem esse crassitiem Sansoniani Operis, pro amplitudine voluminis, videret. Tum verò me rogavit an vellem aliquid ad ornatum ejus operis conferre. Ego quidem, aliis quippe occupatus, multa polliceri non potui, nec planè operam meam negare sustinui.

Sciebam Editionem Bonfrerianam satis mendosam esse, cùm in *Hieronymi*, tùm in *Eusebii* verbis; quippe quam multis locis, prout usus postulaverat, cum Editione Operum Hieronymi Lutetiæ à *Joan. Martiano*, Monacho Benedictino, anno MDCXC, inchoata contuleram. Multa deprehenderam peccata, quæ videbantur Typographorum inscitia esse tribuenda; multa etiam, quæ *Bonfrerii* ipsius, aut qui editionem ejus operis curavit, negligentiam redolebant. Judicabam ergo operæ pretium fore, si à capite ad calcem editiones illæ conferrentur, atque ex posteriore supplerentur, aut emendarentur quæ deerant, aut vitiata erant in priore. Benedictinus enim Monachus, quamvis aliud exemplar Græcum nancisci non potuerit, præter id, quod est in Bibliotheca Regia Parisiensi, quo usus jam erat *Bonfrerius*, tamen id cum editione diligentius contulit, peccataque *Bonfrerii* ac Typothe-